

**ՆԱՆԵ ԶԵՅՆԱԼՅԱՆ**  
*«Հ պետական կառավարման  
ակադեմիայի ասպիրանտ»*

## **ԱՆՁԻ ԱՐԺԵՀԱՄԱԿԱՐԳԻ ԶԵՎԱՎՈՐՄԱՆ ԱՇԽԱՐՀԱՅԱՑՔԱՅԻՆ ՆԱԽԱԴՐՅԱԼՆԵՐԸ**

Հոդվածում քննարկվում են «անձնային արժեք» հասկացության սահմանումների և մոտեցումների բազմատեսակությունը, որոնք ներկայացվում են մի քանի խմբերում: Ներկայացվում են արժեքային համակարգի ձևավորման հիմնական գործոնները:

**Հիմնաբառեր.** անձնային արժեք, սոցիալականացում, ներքնայնացում, զարգացման օրինաչափություններ:

Անձնային արժեքների խնդիրը քննարկվել է տարբեր գիտակարգերի շրջանակներում և տրվել դրանց բազմաթիվ սահմանումներ: «Անձնային արժեք» հասկացությունը կիրառվում է տարբեր նշանակություններով: Սակայն միասնական կարծիք այս հասկացության սահմանման վերաբերյալ գոյություն չունի: Գրականության մեջ առանձնացնում են «արժեք» հասկացության առավել քան հարյուր սահմանումներ, որոնցում առաջարկվում են տվյալ խնդրի դիտարկման տարբեր մոտեցումներ և կողմեր: Մեր առջև նպատակ ենք դրել խմբավորել տարբեր տեսություններում անձի արժեքների վերաբերյալ ներկայացվող տեսակետները, ինչը հնարավորություն կտա բացահայտելու արժեքների ձևավորման հիմնական օրինաչափությունները:

Մասնագիտական գրականության վերլուծության արդյունքները ցույց են տալիս, որ յուրաքանչյուր հասարակություն, սոցիալական խումբ, հասարակական խմբավորում ստեղծում է իրեն հատուկ ընդհանուր և յուրահատուկ արժեքային համակարգեր և վարքականոններ, որոնք արտահայտում են նրանցում գերակայող հետաքրքրությունները և նպատակները: Այդ հասարակությանը պատկանող մարդը ընդունում է դրանք որպես իր վարքի չափանիշ:

Անձնային արժեքը մարդու մասին գիտությունների՝ փիլիսոփայության, հոգեբանության, մանկավարժության, սոցիոլոգիայի և այլ գիտությունների կարևոր խնդիրներից մեկն է: Չնայած որ արժեքների հոգեբանական սահմանումների մեծամասնությունը հիմնվում են արժեքների և արժեքային կողմնորոշումների փիլիսոփայական և սոցիոլոգիական հայեցակարգերի վրա, անձնային արժեքների հոգեբանական հասկացումը էապես տարբերվում է այլ գիտություններում արժեքների մեկնաբանությունից: Անձի տեսություններում «անձնային արժեք» հասկացությունը մեր

կողմից հանգամանորեն վերլուծվել է «Անձնային արժեք» հասկացությունն անձի տեսություններում» հոդվածում [1]:

Մոտեցումների և սահմանումների բազմատեսակության մեջ «արժեք» հասկացությունը պայմանականորեն կարելի է բաժանել մի քանի խմբի: Առաջին խմբում ներառված են հասկացություններ, որոնց հեղինակներն արժեքները դիտում են որպես կարծիք, պատկերացում կամ համոզմունք: Որպես այս ուղղության ներկայացուցիչ՝ կարելի է համարել Մ. Ռոկիչին, ով արժեքները համարում է կայուն համոզմունք այն համատեքստում, որ վարքի որոշակի ձևը կամ գոյության վերջնական նպատակը նախընտրելի է անձնային կամ սոցիալական տեսանկյունից [20]:

Երկրորդ խմբում կարելի է ներառել այն սահմանումները, որոնց հեղինակները «արժեքը» (կամ «արժեքային կողմնորոշումը») սահմանում են որպես սոցիալական դիրքորոշումների կամ հետաքրքրությունների տարատեսակ կամ նմանատիպ երևույթ (Մ. Վեբեր, Ա. Ջորավոմիսլով, Դ. Ուզնաձե): Դ. Ուզնաձեն դիրքորոշումը մեկնաբանում է որպես անձի կամ խմբի սոցիալական փորձի միջոցով ձևավորված նախատրամադրվածություն սոցիալապես նշանակալի օբյեկտները ընդունելու և գնահատելու, ինչպես նաև որոշակի գործողություններին անձի կամ խմբի պատրաստվածությունը, որոնք ուղղված են սոցիալապես նշանակալի օբյեկտներին [15]: Ա. Ջորավոմիսլովի կարծիքով՝ արժեքային կողմնորոշումները անձի դիրքորոշումներն են նյութական և հոգևոր մշակույթի արժեքների նկատմամբ [9]: Մ. Վեբերը արժեքը մեկնաբանում է որպես այս կամ այն պատմական ժամանակաշրջանի դիրքորոշում, որպես դարաշրջանին հատուկ հետաքրքրասիրության ուղղություն [6]:

Սահմանումների հաջորդ խումբը միավորում է մոտ/կից հասկացություններ, ինչպիսիքն են՝ պահանջումներն ու շարժառիթները (Գ. Դիլիգենսկի, Բ. Դոդոնով, Ֆ. Վասիլյուկ):

Կարելի է առանձնացնել սահմանումների մեկ խումբ ևս՝ որպես իմաստ (Դ. Լեոնտև, Ա. Սեռի, Մ. Յանիցկի, Վ. Ֆրանկ):

Հոգեբանական գիտության բնագավառում արժեքների մեկնաբանության բազմազանության մեջ առավել տարածում ունի այն մոտեցումը, որում արժեքը դիտարկվում է որպես հասարակության կենսագործունեության որոշակի արդյունք: Այդ մոտեցումը ցայտունորեն արտահայտված է փիլիսոփաների և սոցիոլոգների գիտական աշխատություններում: Հոգեբանական գիտության բնագավառում անձնային արժեքների հասկացման գերակայող մոտեցումներից մեկը այն է, որ արժեքը դիտվում է որպես պահանջումներին և շարժառիթներին համարժեք հասկացություն: Մասնավորապես՝ անձնային արժեքները և իմաստը կենտրոնական տեղ են զբաղեցնում հումանիստական հոգեբանության մեջ:

Անձի արժեքային համակարգի ձևավորման և շարժընթացի խնդիրը ընդունված է դիտարկել հոգեկան զարգացման ընդհանուր օրինաչափությունների համատեքստում: Այն անմիջականորեն կապված է տարիքային զարգացման առանձնահատկությունների հետ: Վերլուծելով անձի իմաստային ոլորտի ձևավորման և զարգացման խնդիրը՝ Ա.Սեռին պնդում է, որ այդ գործընթացները արտացոլում են տարիքային և անձնային զարգացման ընդհանուր օրինաչափությունները: Դ.Լեոնտևը նշում է, որ յուրաքանչյուր անձի զարգացման գործընթաց բնութագրվում է սոցիալական հանրության արժեքների և դրանց փոխակերպումների, այսինքն՝ անձնային արժեքների կերպափոխմամբ [12]: Տվյալ խնդիրը ներկայացվել է հոգեբանության տարբեր դպրոցների և ուղղությունների ներկայացուցիչների կողմից: Ռուսական հոգեբանության մեջ այս խնդրին անդրադառնում են Վ. Ալեքսեևան, Ս. Բուբնովան, Գ. Բուդինայտեն, Տ. Կոռնիլովան, Ա. Վոլոչկովը, Ե. Երմոլենկոն, Դ. Լեոնտևը, Ա. Սեռին, Վ. Չուլոնովսկին, Մ. Յանիզկին և ուրիշներ: Որպես անձնային արժեքների ձևավորման նախադրյալներ՝ դիտարկվում են սոցիալականացման առանձնահատկությունները, տարիքային զարգացման փուլերը, երեխայի ինտելեկտուալ զարգացումը, կրթությունը, տեղեկույթը, մակրո- և միկրոմիջավայրի առանձնահատկությունները: Անձի արժեքային համակարգի ձևավորումն իրականանում է մի շարք գործոնների ազդեցությամբ: Այդ գործոններն են ընտանիքը, հասարակությունը, դպրոցը, շրջապատի սոցիալական արժեքները և այլն:

Ն. Ժուրավյովան արժեքային կողմնորոշումների ձևավորման կարևոր նախապայման է համարում վաղ սոցիալականացման պայմանները [8]:

Արժեքային համակարգի ձևավորումն անհնար է պատկերացնել հասարակությունից, մարդկանց հետ շփումից զատ: Անձի արժեքների համակարգը ձևավորվում է սոցիալականացման ընթացքում ինտերիորիզացիայի (ներքնայնացման)՝ հասարակական-քաղաքական, բարոյական, գեղագիտական իդեալների (հասարակական փորձ և մշակույթ) յուրացման միջոցով, որոնք բնորոշ են տվյալ սոցիալական հանրությանը: Արժեքային համակարգի ձևավորումն ընթանում է դաստիարակության և կրթության ընթացքում սոցիալական փորձի յուրացման միջոցով: Անձնային արժեքները ձևավորվում են սոցիալականացման ամբողջ ընթացքում (Ռուչկա՝ 1976, Անանև՝ 1996, Լեոնտև՝ 1998, Սուրինա՝ 1996) [8]:

Ժ. Պիաժեն անձի արժեքային կողմնորոշումների զարգացումը կապում է ինտելեկտուալ զարգացման մակարդակի հետ: Նա համարում էր, որ բարոյական դատողությունների ներքնայնացումը երեխաների մոտ տեղի է ունենում զարգացող մտածողական կառուցվածքների և աստիճանաբար ընդլայնվող սոցիալական փորձի փոխազդեցության արդյունքում

[10]: Եթե զարգացման առաջնային փուլում երեխան բարոյական նորմերը դիտարկում է որպես հաստատված և անփոփոխ, իսկ արարքի բարոյական գնահատման չափանիշը բացառապես դրա հետևանքներն են, ապա վերացական մտածողության զարգացմանը զուգընթաց (6-7 տարեկան) երեխայի մոտ առաջանում է արարքը ոչ միայն հետևանքների, այլև մտադրության տեսանկյունից գնահատելու ընդունակություն: Այսպիսով, երեխայի վերացական ինտելեկտի զարգացմանը զուգընթաց ձևավորվում է բարոյական գնահատականների հարաբերականության, դրանց պայմանական բնույթի մասին պատկերացում, այսինքն՝ «բարոյական ռեալիզմը» փոխարինվում է «բարոյական հարաբերականությամբ» [16]:

Լ. Կոլբերգը, հստակեցնելով Ժ. Պիաժեի տեսակետը երեխայի բարոյական զարգացման խնդրին, առանձնացնում է դրա մակարդակները և փուլերը: Առաջին՝ նախահամաձայնեցման մակարդակում բարոյական արժեքներին ենթարկվելը տեղի է ունենում պատժից խուսափելու կամ խրախուսանքի եսասիրական պատկերացումներից ելնելով: Համաձայնեցման մակարդակում շրջապատի նորմերը և արժեքները ընդունվում են ըստ առաջնայնության (բեփերենտности), արտաքին հեղինակության հիման վրա, հետագայում նաև, ըստ սպասելիքների համապատասխանության, մտերիմների անհավանությունից կամ քննադատությունից խուսափելու ցանկության: Հաջորդ մակարդակում ձևավորվում են լայն սոցիալական նորմերին անձի ուղղվածությունը, մեղքի զգացումից խուսափելու ձգտումը: Հետհամաձայնեցման մակարդակում երեխան սկսում է հետևել սեփական բարոյական սկզբունքներին, որոնք չեն համապատասխանում շրջապատի արժեքներին: Այս փուլում անձնային արժեքներն որոշվում են վերացական, համընդհանուր արժեքներով, տեղի է ունենում դրանց համաձայնեցում հասարակության և ուրիշների արժեքների հետ, կողմնորոշումն ուղղվում է դեպի խղճի կանոնները, համընդհանուր էթիկական սկզբունքները [19]:

Լ. Վիգոտսկին քննադատում է Ժ. Պիաժեի հայեցակարգում ներկայացվող սոցիալականացման հասկացումը՝ որպես սոցիալական միջավայրի արտաքին ճնշում, որը երեխային ստիպում է ընդունել մտքի օտար սխեմաներ: Լ. Վիգոտսկին և նրա հետևորդները զարգացրել են ներքնայնացման մասին պատկերացումը որպես սոցիալականացման կառուցակարգ: Լ. Վիգոտսկու պնդմամբ՝ ներքնայնացումն անձի կենսաձևի անցումն է սոցիալականից դեպի անհատականը (ներհոգեկանը) [7]:

Ա. Լեոնտևը առանձնացնում է ներքնայնացումը՝ որպես անձնային արժեքների և իմաստների ձևավորման կարևորագույն կառուցակարգ՝ ներկայացնելով այն որպես անձի հոգեկանի ներքին կառույցների ձևա-

վորման գործընթաց՝ արտաքին սոցիալական գործունեության կառույցների յուրացման շնորհիվ կամ առարկայական գործունեության կառույցվածքի՝ գիտակցության ներքին պլանի կառուցվածքի փոխակերպման շնորհիվ [11]: Բ. Անանը դիտարկում է ներքնայնացումը որպես հասարակական փորձի և մշակույթի, որոշակի դերերի և գործառույթների յուրացման արդյունք: «Շարժառիթավորման և արժեքների բոլոր ոլորտները սահմանվում են որպես անձի հասարակական կայացում» [2]:

Դ. Լեոնտևը ներքնայնացման գործընթացը ներկայացնում է որպես սոցիալական խմբի արժեքներից անցում դեպի անձնային արժեքներ: Սոցիալականացումը, ըստ Լեոնտևի, սոցիալական հանրության արժեքների յուրացումն է և դրանց փոխակերպումը անձնային արժեքների [12]:

Ն. Ժուրավյովան անձի արժեքային համակարգի ձևավորման գործում կարևորում է անձի կյանքի մակրո- և միկրոսոցիալական պայմանները, ինչպես նաև նրա սոցիալական և մասնագիտական բնութագրերը: Մակրոսոցիալական պայմանների շարքում կարևոր են համարվում հասարակության կյանքի սոցիալ-տնտեսական, սոցիալ-մշակութային, սոցիալ-քաղաքական և գաղափարական, ինչպես նաև հոգևոր պայմանները, սոցիալական նորմերը (բարոյականության, իրավունքի, կրոնի և այլն), պատմական ժամանակահատվածի առանձնահատկությունները, տարածաշրջանային պայմանները, հասարակությունում գերակշռող արժեքները [8]:

Անձի արժեքների համակարգը հիմնված է այն հասարակության գաղափարախոսության վրա, որին նա պատկանում է: Տարբեր գաղափարախոսությունների դեպքում առաջնությունը կարող է տրվել տարբեր արժեքների:

Անհատական և սեռատարիքային տարբերություններին զուգահեռ կան նաև արժեքային կողմնորոշումների ընդհանուր բնութագրեր, որոնք բնորոշ են օնտոգենեզի որոշակի փուլերին: Արժեքային կողմնորոշումների փոփոխությունների գործընթացը, դրանց որակական վերակառուցումն առավել կերպով տեղի է ունենում երեխայի՝ օնտոգենեզի մի փուլից մյուսին անցնելու շրջանում: Հենց այդ ժամանակ ի հայտ եկող նորագոյացությունների հիման վրա են առաջանում երեխայի արժեքային կողմնորոշումների փոփոխության միտումները, որոնք հակասության մեջ են մտնում գոյություն ունեցող շարժառիթների և պահանջմունքների համակարգի հետ՝ կանխորոշելով դրանց որակական վերակառուցումը [8]:

Սոցիալականացման հոգեբանական կառուցակարգերը՝ ներշնչանքը և նմանարկումը, ներկայացված են Գ. Տարդի և Զ. Բոլդուոինի սոցիալ-հոգեբանական հայեցակարգերում: Գ. Տարդը պնդում է, որ նմանարկումը հասարակությունում ունի նույնպիսի նշանակություն, ինչպես և ժառանգականությունը կենսաբանության մեջ: Զ. Բոլդուոինը համարում էր, որ

այլոց մտքերի, վարքի նմանարկումն անձի մեջ ձևավորում է հասարակությունում ապրելու ընդունակություն: Իր անձի գիտակցումը երեխայի մոտ զարգանում է աստիճանաբար, շրջապատող միջավայրի հանդեպ նմանարկման միջոցով:

Սոցիալական արժեքների և իմաստների յուրացման մեկ այլ կառուցակարգ է նույնականացումը: Վ. Լեոնտևը պնդում է, որ նույնականացման կառուցակարգի հիմնական բաղադրիչն անձի համար նշանակալի արժեքների ապրումն է, իսկ անձի զարգացումն ընթանում է անձնային իմաստների առանձնահատուկ կրկնօրինակման միջոցով (Леонтьев В. Г., 1992, с. 80):

Անձն իր զարգացման ընթացքում ներգրավվում է տարբեր փոքր և մեծ խմբերի մեջ: Դրանցից յուրաքանչյուրի կյանքում մասնակցությունն անհատի մեջ ձևավորում է որոշակի բնորոշ գծեր: Նրա անձնային հատկությունները ձևավորվում և զարգանում են կախված որոշակի սոցիալական շերտին, ազգին, էթնիկ խմբին, մասնագիտական կատեգորիային, ընտանիքին և այլ խմբերին պատկանելությունից: Աշխարհի մասին պատկերացումները, բարոյական հայացքները և համոզմունքները, մտածելակերպը և աշխարհայացքը, հետաքրքրությունները, ձգտումները և արժեքները պայմանավորվում են խմբային գիտակցության առանձնահատկություններով, որում անձը ձևավորվում է և որում ընթանում է նրա առօրյա գործունեությունը [8]:

Փոքր սոցիալական խումբը ոչ միայն անձին առաջարկում է որոշակի արժեքներ, այլև ինչ-որ չափով ազդում է անձի վրա՝ ուղղորդելով նրան դեպի այդ արժեքները: Մի կողմից խումբը և դրա առանձին անդամներն են ազդեցություն գործում անձի վրա, մյուս կողմից՝ անձն ինքն է ազդեցություն գործում խմբի մյուս անդամների և ամբողջ խմբի վրա: Հարմարվելով, ինտեգրվելով և անհատականանալով խմբում՝ յուրաքանչյուր անձ, իր հերթին, ազդեցություն է ունենում խմբի, դրա արժեքների, արժեքային կողմնորոշումների և արժեքային դիրքորոշումների վրա [8]:

Դ. Լեոնտևը համարում է, որ սոցիալական արժեքների յուրացումը միշտ միջնորդավորված է անհատի համար ռեֆերենտային փոքր խմբերի արժեքներով: Նա շեշտում է, որ անհատական զարգացման նախնական փուլերում այդպիսի խումբ է ընտանիքը, իսկ դեռահասության տարիքում՝ հասակակիցների խումբը [12]:

Ա. Պետրովսկին առանձնացնում է մի շարք գործընթացներ, որոնցում տեղի է ունենում անձի արժեքային կողմնորոշումների համակարգի ձևավորումը և զարգացումը: Այդ գործընթացներն են պերսոնալացումը, որը ներառում է հարմարումը (որպես անհատի կողմից սոցիալական նորմերի և արժեքների յուրացում), անհատականացումը (որպես սեփական «Ես»-ի

արժեքների ամրապնդում) և ինտեգրումը (որպես անձի և խմբի արժեքների միջև առկա հակասությունների վերացում՝ դրանց փոխակերպման ճանապարհով) [14]:

Գ. Մ. Անդրեան, որպես արժեքների անհատական համակարգի ձևավորման միջավայրային գործոններ, առանձնացնում է ընտանիքը, դպրոցը, աշխատանքային կոլեկտիվը, որոնք «սոցիալական փորձի միջնորդ» են, որոնցում անձը հաղորդակցվում է նորմերի և արժեքների համակարգի հետ [3]:

Ա. Վ. Մուդրիկն առանձնացնում է սոցիալականացման գործոնների չորս խումբ: Հեղինակը **մեզագործոնների** շարքին է դասում համաշխարհային գործընթացները, որոնք այս կամ այն չափով ազդեցություն են գործում բոլոր մարդկանց սոցիալականացման վրա: Հաջորդ խումբը ներկայացնում են **մակրոգործոնները**. դրանք են պետությունը, էթնոսը, հասարակությունը, որոնք ներգործում են գերազանցապես տվյալ երկրում ապրող անձանց սոցիալականացման վրա: Սոցիալականացման գործոնների հաջորդ խումբն են կազմում **մեզագործոնները**, որոնք միևնույն երկրում համատեղ ապրող կամ միասին հաղորդակցվող մեծ խմբերի սոցիալականացման պայմաններն են: Դրանք են քաղաքը, գյուղը, համայնքը, հեռուստատեսությունը, տեղեկատվական այլ համակարգերը և այլն: **Միկրոգործոններն** անձի վրա անմիջապես ներգործություն ունեցող գործոններն են, ինչպիսիք են՝ ընտանիքի, հասակակիցների և շրջապատի հետ շփումը, դաստիարակչական կրթական կազմակերպությունները, ինչպես նաև հասարակական, կրոնական և այլ նմանատիպ կազմակերպությունները: Սոցիալականացումը (հանդես է գալիս երկու՝ առաջնային և երկրորդային սոցիալականացման մակարդակներով: Առաջինի մեջ հասկացվում է փոքր խմբերում միջանձնային հաղորդակցումը, ինչպիսիք են՝ ընտանիքը, հասակակիցների, մտերիմների, ուսուցիչների և այլ խմբերը: Երկրորդային սոցիալականացումը տեղի է ունենում սոցիալական մեծ խմբերի և ինստիտուտների մակարդակում: Դրանք են ֆորմալ կազմակերպությունները, կրթական, զինվորական ու պետական այլ հաստատությունները և այլն [13]:

Մուդրիկի առաջարկած ձևաչափը նման է Ու. Բրոնֆենբրենների ներկայացրած «էկոլոգիական համակարգերի ձևաչափին», ըստ որի՝ անձի կենսամիջավայրը համակենտրոնորեն ընդլայնվող համակարգ է, որտեղ յուրաքանչյուր նախորդ համակարգ ներառված է հաջորդ ավելի լայն համակարգի մեջ: Ավելի բարձր մակարդակի համակարգերն ազդում են ստորև գտնվողների վրա [5]:

Կյանքի տարբեր ոլորտների նկատմամբ վերաբերմունքը մարդու մեջ ձևավորվում է ի թիվս այլ գործոնների, կրթության ընթացքում ստացած

տեղեկույթի միջոցով: Կրթության սոցիալական ինստիտուտի միջոցով իրականանում է արժեքային մշակույթի փոխանցումը սերնդեսերունդ:

Վ. Աֆանասևը գրում է, որ ընտանիքում և դպրոցում անձի ձևավորման գործընթացը իրականանում է նախևառաջ «տեղեկատվական ուղիով . անձին ուրիշների կողմից ստացվող համապատասխան տեղեկություն փոխանցելու միջոցով»: Մշակույթի, հասարակության արժեքների յուրացումը իրականանում է հասանելի տեղեկատվական միջոցների, մարդկանց հետ շփման միջոցով [4]:

Անձի արժեքային համակարգի ձևավորման գործում տեղեկույթի ազդեցության կառուցակարգերն անհրաժեշտ է առավել հանգամանորեն վերլուծել առանձին ուսումնասիրությունների շրջանակներում:

Այսպիսով, ըստ մասնագիտական գրականության վերլուծության արդյունքների, անձնային արժեքների մասին պատկերացումները կարելի է ներկայացնել հինգ խմբով. արժեքը՝ որպես պատկերացում, դիրքորոշում, արժեքը՝ որպես պահանջմունք կամ շարժառիթ, արժեքը՝ որպես իմաստ և որպես հասարակության կենսագործունեության արդյունք:

Անձի արժեքային համակարգի ձևավորման և շարժընթացի խնդիրը ընդունված է դիտարկել որպես հոգեկան զարգացման ընդհանուր օրինաչափություն: Այն անմիջականորեն կապված է տարիքային զարգացման առանձնահատկությունների հետ: Այդ գործընթացում հատկապես կարևորվում է ներքնայնացման գործընթացը՝ որպես սոցիալական խմբի արժեքներից անցում դեպի անձնային արժեքները: Արժեքային համակարգի ձևավորման գործում անհրաժեշտ է հաշվի առնել ինչպես օբյեկտիվ, այնպես էլ սուբյեկտիվ մի շարք գործոններ, որոնց թվում են սոցիալական պայմանները, անձի սոցիալականացման բնութագրիչները, շարժառիթային ոլորտի առանձնահատկությունները և անձնային բնութագրիչները:



### ՕԳՏԱԳՈՐԾՎԱԾ ԱՂԲՅՈՒՐՆԵՐ

1. **Ջեյնայան Ն. Ա.**, Անձնային արժեք հասկացությունն անձի տեսություններում, Հանրային կառավարում, «Պետական ծառայություն» Երևան, 2/2017, 191 էջ:
2. **Ананьев Б. Г.**, О проблемах современного человекознания. М.: Наука, 1977, 344 с.
3. **Андреева Г. М.**, Психология социального познания. М.: Аспект-Пресс, 2000, 288 с.
4. **Афанасев В. Г.**, Социальная информация и управление обществом. М.: Политиздат, 1975, 408 с.
5. **Бронфенбреннер У.**, Два мира детства. Дети в США и СССР: Пер. с англ. - М., 1976, 165 с.
6. **Вебер М.**, Основные социологические понятия, Избр. произведения, Сост., общ. ред. и послесл. Ю. Н. Давыдова. М.: Прогресс, 1990. сс. 602-643.
7. **Выготский Л. С.**, Педагогическая психология / под ред. В. В. Давыдова. - М.: Педагогика-Пресс, 1996. - 536 с.
8. **Журавлева Н. А.**, Психология социальных изменений: ценностный подход. - М.: -зд-во «Институт психологии РАН», 2013. – 524 с.
9. **Здравомыслов А. Г.**, Потребности, интересы, ценности. М.: Политиздат, 1986. – 222 с.
10. **Крайг Г.**, Психология развития [Текст]: Пер. с англ. / Г. Крайг. – СПб.: Питер, 2000. – 992 с.
11. **Леонтьев А. Н.**, Деятельность, сознание, личность. - М.: Политиздат, 1975, -304 с.
12. **Леонтев Д. А.**, Развитие личностных ценностей в общественном контексте, Вестник Московского Университета. Сер. 14. Психология. 1997. №1. сс. 20-27.
13. **Мудрик А. В.**, Социализация человека: Учеб. пособие для студ. высш. учеб. заведений, М.: «Издательский центр Академия», 2004, 304 с.
14. **Петровский А. В.**, Личность. Деятельность. Коллектив. М.: Политиздат, 1982, 255 с.
15. **Узнадзе Д. Н.**, Психология установки. СПб.: Питер, 2001. «Психология-классика», 416 с.
16. **Флейвелл Дж.**, Генетическая психология Жана Пиаже [Текст]: Пер. с англ. / Дж. Флейвелл. М.: Просвещение, 1967, 623 с.
17. **Яницкий М. С.**, Ценностные ориентации личности как динамическая система. Кемерово: Кузбассвуиздат, 2000, 204 с.
18. **Frankl V. E.**, Man's search for meaning: The classic tribute to hope from the Holocaust. Rider, UK, 2004, p. 147.
19. **Kohlberg L.**, Moral stages and moralization: The cognitive developmental approach [Text] / L. Kohlberg // Moral development and behavior: Theory research and Social issues. - N.Y., 1976. - P. 31-53. (287)
20. **Rokeach M.**, The Nature of Human Values. N.Y.: Hie Free Press, 1973.

**НАНЕ ЗЕЙНАЛЯН**

*Аспирант Академии государственного  
управления Республики Армения*

## **МИРОВОЗЗРЕНЧЕСКИЕ ПРЕДПОСЫЛКИ ФОРМИРОВАНИЯ ЛИЧНОСТНЫХ ЦЕННОСТЕЙ**

В статье анализируются различные интерпретации понятия личностной ценности, делается попытка сгруппировать их в нескольких категориях. Представлены основные факторы формирования системы ценностных ориентации.

**Ключевые слова:** личностные ценности, социализация, интериоризация, закономерности развития.

**NANE ZEYNALYAN**

*PhD Student of the Public Administration  
Academy of the Republic of Armenia*

## **IDEOLOGICAL PREMISES OF THE FORMATION OF PERSONAL VALUES**

The article presents different interpretations and definitions of the concept of personal values. The diversity of interpretations was presented in a few groups. In the article were discussed the factors of formation of the personal values system.

**Keywords:** personal values, socialization, interiorization, development patterns.